

Heiqgoengsae Bouxcuengh:

Vwnzva Cienzdoengj Daegsaek Bouxcuengh Minghhoengh Yinxvunz

壮族特色传统文化：魅力“壮师剧”

□ Leix Hoengz



▲ Ngoenzneix ndaw mbanj yienj Heiqsaecuengh.



▲ Vunzmbanj Gingloz Vujmingz angq diuq Heiqsaecuengh.



▲ Seiz cuengqcaeq diuq Fouxsaecuengh mbaenj fuk.



▲ Heiqsaecuengh mauhngeg miz lai cungj lai yiengh.



▲ Heiqsaecuengh Sanglinz yienj ndaej naemqnini.

Heiqgoengsae Bouxcuengh dwg cungj citheiq cijdan Bouxcuengh miz ndeu, lizsij gyaenanz yienghdoengh yienghvah diuqfoux lai cungj lai yiengh, daegsaek minzcuz naekgywg, dwg aen bouhfaenh gyoebbaenz diuqfoux ndawbiengz Bouxcuengh. Beixnuengx Bouxcuengh moix baez roebbungz ngoenzciet ngoenz angq-hoh, cungj gyaenz cingj goengsae (canghheiq) yienj heiqgoengsae, gij neiyungz citheiq yienjok de cawz miz gij citheiq cienzdoengj le, lij gag bien gag yienj gij citheiq lwnhgangj gij guhhong gvaq saedceij ngoenznaengz vunzlai sugsed gyaenz yawj haengj dingq haenx, ndaej daengz vunzlai haenggyaez. Bi 2007, heiqgoengsae Bouxcuengh ndaej lied haeuj Cung-guek feihvuzciz vwnzva yizcanj mingzloeg.

Heiqgoengsae Bouxcuengh caemh heuhguh Heiqsaecuengh rox-naeuz Citheiqsaecuengh, dwg cungj diuqfoux cuengqcaeq gyihaeuj gyau-baij Meizsanh ndeu, bi 1987 Swcigih cingqsik ancoh guh "Citheiq-saecuengh". Cungj yizsi cuengqcaeq

neix gak dieg heuhfap mbouj doengz, miz "dwkcaemj" "guhcai" "guhsae" "diuqsae" "ciengqsae" doenghgij heuhfap neix, goekgaen de dwg daj ciengzdauh guhfap ndawbiengz Bouxcuengh ciuhgeq daeuj, hainduj dwg yizsi cuengqcaeq ciuhnduj vih mbaenj rumz swnh fwn yinz, dajndaem dajciengx fungsou, ranz-vunz ndangcangq swnhleih vunz Bouxcuengh youq ndaw guhhong gvaq saedceij cauh okdaej haenx, dwg cungj yienghsik diuqfoux youq Ciuh-cingh seiz Yunghcwng, Genzlungz ndaej daj boux goengsae ndeu ciengq gojgaeq hwngfat daengz lai giek ciengq gojgaeq daengz fouxmauh-ngeg, riengzlaeng couh hainduj faen-giek yienj gojgaeq ndeu, doengciengz youq ngoenzciet caeuq miz hozdung cuengqcaeq seiz biujyienj, youq Namzningz Si Vujmingz, Yunghningz, Sanglinz, Majsanh, Laizbinh Si Hinghbinh, Vujsenh, Siengcouh, Hozciz Si Duh' anh, Yizcouh, Vanz-gyangh daengj gih si yienh caeuq Gveigangj Si, Ginhcouh Si mbanj dieg riuzcienz ndaej haemq hwng, daengz seizneix gaenq miz 573 bi lizsij, seizneix youq Laizbinh Si, Nanzningz Si doenghgij mbanj Bouxcuengh comzyouq haenx, ca mbouj geijlai mbanjmbanj miz ban Heiqsaecuengh roxnaeuz bouxyienj Heiqsaecuengh.

Aenvih dieg Bouxcuengh comzyouq haenx ginghci vwnzva hwngfat mbouj doxdaengh, fungsug sibgveng caeuq yawjgap yinxdaeuz mbouj doxdaengz, gij hingzsi biujyienj, daegdiemj funggek caeuq neiyungz yienjciengq heiqgoengsae gak dieg caemh mbouj doengz geijlai. Itbuen daej gangj gij funggek Heiqgoengsae

dwg funggek sohseid ciuhgeq, yienghdoengh onjcaem rengzrdw, bouxyienj aeu guhdaengz yamqgung aeu daemq, ndang aeu bibuengq, caekhaex aeu niuj, gyauejhoq aeu saenz; mwh diuqfoux ciengzseiz youq mwh diemjgyong roq ndaej deihaenj haenqhwd haenx sawqmwh byoqheiq gungq gyauejhoq, ndangdaej riengz dwk fanfoek bibuengq, yienghdoengh diuzga lai cungj lai yiengh, gawq miz daegdiemj, youh dawzyinx dangqmaz. Heiqgoengsae cungj aeu gyongrwi, gyongbej, laz, cemq doenghgij yozgi ndaekroq neix buenx foux; ndawde gij heiqgoengsae riuzcienz youq rangh-dieg Vujmingz, Sanglinz, Vujsenh, Ginhcouh daengj dieg haenx daiq-biujsingq haemq yienhda.

Heiqgoengsae aeu gij yaem-wenq fwen caeuq gizbaiz Bouxcuengh guh goekdaej, gvangqlangh supaeu gij goj ndawbiengz, gojriuz Bouxcuengh hawj de neiyungz lai cungj lai yiengh, yungh cungj hingzsi Fwenguengh lwnhgoj, gangjbeg gig noix, doq ciengq doq foux, aeu ciengq guhcawj, hingzsi biujyienj caemh mbouj miz dingh; ciuq doiq Vujmingz daengj cibgeij aen gih si yienh haenx loq gyoepsueng baez ndeu, gungh miz 《Fouxamyuengz》《Foux Moz It Daih-vuengz》《Fouxlauzungq》《Hoenx Seiq Sai》《Fouxgyongrwi》doenghgij citheiq neix baenz it bak lai diuz. Riengzdwk citheiq yienjok lai, "vunz saenz" beijlaeh bienqvaq, mauhngeg ciemhciemh aeu vehcang daej dinglawh, fouxgoengsae caemh bienqbaenz le cungj citheiq ndeu—Heiqsaecuengh, de caeuq Heiqcuengh caemhcaez, baenz le song duj va'mbu caemh gaenqva ndeu gyaundeid yienhda.



▲ Vunzmbanj Lozboh Segih Vujmingz vienj Heiqsaecuengh.